

17/06/2003

Kehadiran perwakilan dijangka paling besar

KUALA LUMPUR: Perhimpunan Agung Umno kali ini, di mana Datuk Seri Dr Mahathir Mohamad akan hadir untuk kali terakhir sebagai Presiden parti sejak menerajuinya 22 tahun lalu, adalah paling besar dalam sejarah dengan

kehadiran perwakilan dan ahli Umno dijangka melebihi 10,000 orang.

Bagi menampung jumlah hadirin yang besar itu, Dewan Tun Hussein Onn di Pusat Dagangan Dunia Putra (PWTC) akan dijadikan dewan pemerhati dan dilengkapi layar besar untuk membolehkan mereka mengikuti perhimpunan agung itu dengan selesa, khususnya ucapan dasar Presiden pada Khamis ini dan ucapan penggulungan Sabtu nanti.

Sebelum ini, layar besar di ruang legar PWTC menjadi tumpuan hadirin yang berasak-asak untuk mengikuti perjalanan persidangan di dalam dewan.

Ketua Pegawai Eksekutif Putrade Property Management Sdn Bhd (Putrade), Datuk Yaakob Mohammad, berkata memandangkan penyertaan besar perhimpunan kali ini yang mengatasi Sidang Kemuncak Pertubuhan Negara-Negara Berkecuali (NAM) Februari lalu, pihaknya terpaksa membuat persediaan berbeza daripada kebiasaan.

"Kita juga akan sediakan televisyen litar tertutup di setiap aras. Tahun

lalu kita cuma sediakan di aras tertentu saja," katanya pada taklimat mengenai persiapan bagi perhimpunan agung selama lima hari itu di sini, semalam.

Yaakob berkata, perhimpunan kali ini juga akan mempamerkan imej baru terutama daripada segi tirai latar pentas, hiasan dan juga gerai jualan.

Katanya, latar pentas yang dibina sendiri Putrade berdasarkan ilham Datuk Seri Dr Mahathir Mohamad, memaparkan mesej tersirat untuk renungan perwakilan.

"Semua itu, corak dan warnanya mempunyai mesej yang akan difahami perwakilan," katanya sambil menambah 450 lot gerai dengan dinding serta permaidani merah akan disediakan berbanding hanya meja seperti tahun sebelum ini.

Yaakob berkata, memandangkan tempahan makanan daripada badan perhubungan

Umno negeri meningkat, pihaknya akan menyediakan 90,000 sajian berbanding sekitar 65,000 sajian sebelum ini.

Katanya, penyediaan sajian itu membabitkan penggunaan ribuan kilogram (kg) bahan makanan mentah, termasuk daging sebanyak 3,500 kg, ayam (4,600 kg), udang harimau (1,500 kg) dan beras (5,300 kg) selain tujuh ribu butir telur.

"Kami sediakan banyak agar semua yang datang dari seluruh pelosok negara dapat makan dengan teratur. Kami tidak mahu nanti ada yang datang jauh-jauh tapi makanan tak cukup," katanya.

Bagi memastikan kebersihan kawasan PWTC sepanjang perhimpunan agung itu,

Yaakob berkata Putrade mengambil 80 pekerja untuk melakukan kerja pembersihan, khususnya di dewan persidangan, tandas, dapur dan lobi.

"Bagi keselamatan pula kita akan membantu Bahagian Keselamatan Negara dengan menyediakan 85 pegawai," katanya sambil menambah, pada keseluruhannya 580 kakitangan PWTC, termasuk pekerja tambahan, akan terbabit menjayakan perhimpunan agung itu.